



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir_yimiyim



tir yimiyim

TAPAK 7

India-i West Asia tensa agi kongshiba tashi itta tizuktetdar: PM Modi

Taoba Nepal Ato Kilonser K.P. Sharma Oli puogo



VOL. XXIII ISSUE NO. 165 (ADOK 165) DIMAPUR AMUNGNÜ (SUNDAY) METSÜREMI (MARCH) 29, 2026

₹ 5.00

MP Supongmeren-i Centre dang Kohima Medical College ajungkettsü ayongzüker

Dimapur, March 28, 2026 (TYO): Lok Sabha MP S. Supongmeren Jamir-i Centre sorkar dang Kohima Medical College ya Central Institute ka ama kümduktetsü ayongzüker.

Centre-i Kohima Medical College ya All India Institute of Medical Sciences (AIIMS) mesüra Regional Institute of Medical Sciences ama Central Institute ka kümduktetsü ta ta pai ashi.

Kohima Medical College ya Nagaland nung mezüngbuba medical college lir aser September 2023 nungi lapokogo. Nagaland nung healthcare infrastructure tashi aitsü atema iba reju ya kanga tongtipang lir

ta Supongmeren-i ashi.

KMC renloka arudar saka institutional capacity, advanced medical facilities, aser academic & research opportunities nungdaker. AIIMS jenjang nung mesüra Central Institute ka ama agizükba ajanga Nagaland nung dang masü saka North Eastern region ajungalen healthcare delivery tajungba akümsü ta pai Centre sorkar dang ashi.

Anungji Nagaland nung alirtemi mapang talangka aginüa aruba ama Kohima Medical College ya central institute status mesüra AIIMS-level upgradation asütsü atema maparen inyaktü ayongzüker ta MP Supongmeren-isa Centre ayongzüker.

Tanü Treasuries & Sub-Treasuries ajak lapoktsü

Dimapur, March 28, 2026 (TYO): March 28, 2026 anungdang electricity maliba ajanga Treasuries/Sub-Treasuries nung timtem ajuruba ajanga March 29, 2026 nü mapa inyaktü ta Nagaland Finance Department-i metetdaktügo.

Financial year tembangtsü lia

working days ishika dang lir anungji March 29 anungdang 12:00 ako nungi state ajungalen Treasuries aser Sub-Treasuries ajak nung Government transactions asütsü tetuyuba agütsür ta Finance Department-i tanü sangdong ka nung metetdaktügo.

Küm 48 tsüngda Assam nung taküm candidate tajemtiba lir

Guwahati, March 28, 2026 (Agencies): 2026 Assam Assembly elections kanga ajema akümba ajanga public-i politics mejangrai akümer mesüra political leadership dak temlung malemer südi ta tebilemtsü ka arur.

2026 elections nung Assam kübok constituency 126 nung candidate ajak agi 722 lir ta Election Commission of India (ECI)-i ajanga ashir. Assam nung tesüiba küm 48 tsüngda election agia aruba putiotsü nung tan ya candidate tajemtiba lir.

2021 nung candidate 946 liasü, 2016 nung 1,064, 2011 nung 981, 2006 nung 997, 2001 nung 916, 1996 nung 1,029 aser 1991 nung 1,657 liasü. 1978 nung candidate 938 tashi liasü.

1983 Assam Assembly elections nung candidate 471 dang liasü saka iba election nung ashishitep keta liasü aser ajakibo shilem magi, kechiyong constituency 109 nung dang polling agia liasü.

2026 assembly elections nung candidate ajema ajanga nübertemi electoral politics nung tamang makar asü ta

tasüngdangbatem arur.

Political parties dak temlung masüba, kümsa küm kasa candidate-i dang toktepa aser tejak tasentem, talisa lanurtemi maongka mangutsü südi ta bilemba ajanga candidate ajema akümer südi ta observers-i ashir.

Ano, election nung tokteptsü atema senotsü khuret aliba den ochimashi aser negative campaigning ajanga nisungtemi election nung tokteptsü temlung ulua mebilemer ta parnokisa ashi.

March 26, 2026 nü candidate 67-i parnok nominations meyipa agia liasü aser iba ajanga candidate ajemadok.

Democracy ka nung elections ya benjung ka ama rateter aser candidate aika asübaji nübor teimbai shilem agiba ama züngshir. Ajisüaka Assam nung candidate ajema akümba ajanga tasüngdangba aika adoker.

Tanü lanuputui politics nungi pilaa lira iba ajanga tarutsü asoshi tetsükdaktü tulu bentsür arutsü aser state nung democratic institutions nung khuret ajurutsü ta political observers-isa metetdaktügo.

Centre-i Nagaland nung MSMEs renlokdaktüsinür; yarinür



Dimapur, March 28, 2026 (TYO): Union Ministry of Micro, Small, and Medium Enterprises (MSME)-i Nagaland nung industrial sector ajungkettsü atema sentong balala inyaktü osang metetdaktügo.

"Nagaland atema MSMEs ya kanga tongtipang saka tang mapa kanga ajema lir. Onoki yaritepa maparen inyaka aotsü wadangtem jangjatsü atema arua lir" ta MSME, Joint Secretary Mercy Epao-i ashi.

La ya Entrepreneur Awareness Camp & Special Vendor Development programme lapoktsütsü atema Nagaland nung arua lir.

"Nagaland semdangba ya tang inyakba mapatongtem reprangdangtsü atema dang masü saka maongka balala jangjatsü atema aruba lir. Rongsenketzung renloktü aser lanurtem asoshi mapa aika adokdaktütsü atema onoki bilemer" ta Mercy Epao-i ashi.

"Central Udyam portal nung tang formalized MSMEs 7.9 crore tashi register süa lir. Ministry-i Nagaland nung entrepreneurs dak temlung agütsür aser iba ya National ecosystem nung dendaktütsü aser central schemes o credit facilities nungi tajangzük

agidaktüsinüba atema lir" ta laisa metetdaktü.

"MSME ya multi-sectoral lir aser Nagaland nung products tajung kar lir aser Naga nung dak sempet aika keta lir. Nagaland nung lanurtemi mapa manguba khuret ajurua lir. Lanurtem PMEGP mesüra Mudra nungi sen ngua pei enterprise tenzükdaktüsinür" ta laisa ashi.

National SC-ST Hub scheme ajanga Scheduled Caste aser Scheduled Tribe communities nungi entrepreneurs yarir. Iba nung tongtipang teyari ter agütsür aser iba scheme nung tongshi tongtipang anaji- professional capacity building aser Business Accelerator Programme (BAP) lir ta Mercy-i ashi.

BAP kübok Ministry-i Indian Institutes of Management (IIMs) 11 den tesentaktep yanglua lir aser iba ajanga business models aser growth strategies nung high-level training agütsür. Iba world-class education ngutetsü atema sorkari program fees 90% agütsür. Linük nung tangalen nungibo nisung aikati enroll asür saka Nagaland nungibo iba scheme agir mali ta laisa ashi.

Special Credit Linked Capital Subsidy Scheme ajanga Rs 1 crore loan tashi agütsür aser iba den 25% subsidy lir. Iba scheme

ya SCs aser STs atema kanga tajung lir ta Mercy-isa metetdaktü.

Ano, startups atema Prime Minister's Employment Generation Programme lir. Iba nung manufacturing sector atema Rs 50 lakhs aser service sector Rs 20 lakhs agütsür. Nagaland aser Northeast (SC/ST densema) subsidy 25% lir saka tangar atemabo 15% dang lir ta laisa shisem.

Nagaland nung nübertemi loan agitsü atema khuret tulutiba ajurubaji guarantor lir. Iba asoshi Credit Guarantee Fund Trust for Micro and Small Enterprises ta ser scheme ka lir. Iba scheme kübok tetsür entrepreneurs atema Rs 10 crore tashi loan nung collateral kecha melii 90% agütsür aser tanga categories atema 75% lir ta Joint secretary Mercy-isa metetdaktü.

Entrepreneur Awareness Camp and Special Vendor Development programme ya March 30 nü Senden Riju, Purana bazaar, Dimapur nung agitsü.

Iba sentong ya Ministry of Micro, Small & Medium Enterprises (MSME), Government of India-i Nagaland Government aser Business Association of Nagas (BAN) den yaritepa ayongzüker.

KSM-i 28-Koridang by-election nung tokteper asoshi arok sabang ka ayongzük

Khensa yim, 28th March (TYO): Khensa Senso Mungdang (KSM)-i tang aruya aliba 28-Koridang Assembly Constituency by-election koba 9th April, 2026 nü agitsüba lir, iba nung tokteptsü pur candidate parnok trok (6) nem arok sabang agüja külemi sangdongba "mass declaration" sentong ka Khensa Multi-purpose hall nung ayongzüka kaogo.

Iba sentong nung election nung tokteptsüpur BJP candidate Daochir I. Imchen (Mangmetong), Indian National Congress candidate - T. Chalukumba Ao (Chungtia), NPP candidate - I. Abenjang (Longkhüm), Independent candidate par asem (3) - Imchatoba Imchen (Mangmetong), Army Major Retd. Toshikaba (Chungtia) aser

Imtiwapang (Chungtia) parnok arua pei tebilemtem lemsatop.

Mezüngbuba BJP nungi aser PDA consensus candidate Daochier-i mapang agidang, 2003 nungi 2023 election tashi Koridang nüburi pa tebu (Asür Imkong L. Imchen) nem yimsütsü maongka tulu agüja aruba asoshi pelaba den pa tebui koda Khensa aser Koridang sanger tenzüka aru, yamaji paia pa nem maongka agütsüra, anünga aliba kümsük küm ka sür ita ishikaji tajungtiba nung meranga inyaktü, ta metetdaktü.

Congress ya secular party ka lir, iyongji iba party yagi tamangba yimsü shinga tsütsüa tejak mereprangi inyaksangshir, ta INC candidate Chalukumba-i jembidang metetdaktü. Pa nem maongka agütsüra, MLA-tem nem pei constituency renloktü

atema lemzütsüba Local Area Development Program (LADP) fund ya akok tashi timi amshia Koridang renlokdaktütsü, ta metetdaktü. Pa tang election-i aiba ya züngabo pezübenbuba asütsü.

National People's Party (NPP) ya tribal nübur dak rangloker tentetba ka, iba party yagi lanur aser tetsürtem shirnok tekübokba jenjang aser maongka junga mangurtem lir, item pur jenjang ajungkettsü asoshi inyakba party lir, anungji, iba party ya Koridang asoshi tapet party ka lir, ta NPP candidate I. Abenjang-i metetdaktü. Mangdang tulu yur election nung noktaker, anungji, pa nem maongka agütsüra, yim kecha mebendangi ajak nung sakuku temeim mapa inyaktü, ta paisa nangzüka ashi.

(Maneni tapak 2 nung...)

DC-i anir ketdangsürtemi polling station tem semdang



Dimapur, Metsüremi/March 28 (TYO): Deputy Commissioner-i anir Mokochung District Administration-i Yimyu ward aser Alichen nung polling station tem semdanga asadangogo.

Taruba Koridang A/C By-Election kecha tetsüdaksü makai anep anepa agitsü atema tang maparentem renemshia

aliba asadangsü aser tenüngdakba maparentem tembanga inyakdaksütsü atema ketdangsürtemi item polling station tem semdangogo.

Ketdangsürtemisa tesem anaprongla nung council züngsemtem den senden ayongzüka mena liasü.

Kasa mapang nung Mokochung Deputy

Commissioner Ajit Kumar Verma den tanga sorkar tenzükerem Yimyu ward nung Urban Primary Health Centre (UPHC) nung Dental Equipments sayaba sentong nung shilem agiogo. Iba sentong ya State Bank Of India CSB initiative kübok District Administration Mokochung-i benoka inyaka liasü.

Jalukie nung Hegabenjung amung

Dimapur, Metsüremi/March 28 (TYO): Honibarnü Jalukie nung alu adenba benjung; Hegabenjung kanga longsotepa mungogo.

Iba benjung ya Mbaupungwa Lui Council-i ayongzüka amung. Benjung mapang Minister for RD and SIRD Metsubo Jamir alakteta

tejaoker, DYCM T.R. Zeliang Chief Host, Igumchu Co.host aser Peren DC Hiazu Meru tetushi tejaoker liasü.

Benjung mapang nüburtemi sobaliba ken aser tsüngsang balala sayua liasü. Iba sentong nung yimdaklirtem aser tejaokertemi shilem agia kanga takok ngua mungogo.

KPC ketdangpur tasen shimogo



Kohima Press Club tir tasenba, Vishü Rita Krocha (teyong) den executive council züngsemtem KPC Office nung ketdangpur tasentem sangdongba sentong nung tangokba noksa nung angur.

Kohima, Metsüremi/March 28 (TYO): Kohima Press Club (KPC) Election Commission-i Honibarnü KPC Office nung 2026-2029 tenure atema KPC executive council tasenba sangdongogo.

Team tasenba ya tir Vishü Rita Krocha (Morung Express)-i anir inyaksangshitsü kong Vice President Vincent Belho (DDK), General Secretary Seyiekietuo Keretsü (Nagaland Post), Joint Secretary Nzanbemo Khuvung (Frelancer) aser Treasurer Reyivolu Rhakho (Eastern Mirror) asütsü.

Ketdangpurtem tasentem sangdongba sentong nung Election Commissioner, Chizokho Vero-i, Election Commission-i mapa balala atema Google Form nungi nomination pongu agizük, aser nomination paper kanga junga asadanga sülen Election Commission-i kuli kaket ajak shitak dang ta nguteta liasü, ta ashi.

"Mapa ajak atema tetokteper maliasü asünung candidate ponguprongla tetokteper makai shimogo," ta pai shisem. Vero den külemi Election Commission nung Atou Liezietsu aser Wapangungla Longkumer na densema liasü.

Election Commission-isa, team tasenba nem tenüngsang agütsü aser parnok tarutsü takok nung aotsü imlaja ataba lesatepba den KPC executive council-i KPC Election agitsü atema parnok nem temulung lemteta nongloksüba asoshi pelaba metetdaksü.

Sentong nung o jembiba mapang tir tasenba Vishü Rita Krocha-i, club-i la dak tamang akaba atema pelaba lemsatepba den taoba tir Alice Yhoshü nem Kohima Press Club takok asoshi tenüngsang agüja liasü. Laisa, club nung züngsem ajaki la mapa tajung jangja lir ta ashiba den Alice-i taoba tenure ana tashi anibelem mesasai

bandanga agüja inyakba aser la nükla asoshi maneni tenüngsang agütsü.

Krocha-i, iba mapa ya khuret abentsüba mapa ka aser lai pongba pongba magir ta ashi aser Kohima Press Club tejangraba ataloktsütsü asoshi bendanga agüja tenzüksü tenangzüka agütsü.

Kasa mapang nung mapa toktsüba tir Alice Yhoshü-i, KPC election 2026 takok ngua agitetba atema Election Commission nem tenüngsang agütsü.

Lai, taoba küm ter tsüngda Kohima Press Club ya kü atema professional lokti tentet ka dang masü saka ozüng kibong kümogo, ta ashi.

Club nung mezüngbuba General Secretary aser tanabenbuba tir ama küm 12 tashi tenzüka sülen lai ashiba agi, "ni iba club nung tenure balala inyakba mapang züngsem ajaki nenoki yimdangi maruaka kü nem teyari tulu agütsüogo. Asenok ajaki takok tamakok ajak ajangshiogo aser tongtibangsa lokti tentet ka ama renlokaogo."

Maneni lai külem Executive Council züngsem shirnok iba lima nungi pilaogo, parnoka bilemttshia jembia.

Züngsemtem professional terenlok ngushiba aser laia lenla kar nungho teyari agütsütetba atema pelaba lemsatepba mapang lai ashiba agi, "nenoki teyari agütsüba ajanga KCP tanü iba jenjang nung nokdaka lir."

Ano Yhoshü-i, la dang len sayuba lenir tejentem, la o angartem ajak dang aser la dak tamang katetba atema kanga pelaba lemsatepba liasü.

Menden belenoktsüba mapang lai Executive Council tasenbai tajungtiba inyaksü imlaja ataba aser tir tasenbai anir team tasenba inyakyonga aotsü yongyaseta ataba lemsatep. Laisa, team tasen dang nungdak ajak nung teyari agütsütsü nangzüka liasü.

KSM-i 28-Koridang by-election nung tokteper asoshi... (TAPAK 1 NUNGI...)

IND candidate Imchatoba-i pa election-i aiba nükjidong kar lemsatepang, lenmang balala bushia lanur aser tetsür jenjang ajungkettsütsü, aluyimba dak sentakba nung temulung agütsütsü, Koridang ya regional meimba constituency ka lir, anungji, iba maitsü (identity) ji mesamadaksüi Naga yimden keno koba anendaka lir, itemji awajema inyaksü, ta metetdaksü. BJP aser Congress ticket bener aitsü maongka nguogo, saka nübur ola angadanger Independent nungi noktaker, ta pai ashi. Tanü Nagaland sarkar ya opposition mali aor, anungji, yimli agütsüra nüburi aginüba ama ruling den atongsema aotsü lenmang satema lir, ta paisa shisem.

"MLA ka akümtsüba ji kü indang nükjidong tulutiba lir", ta Independent candidate shiba taoba 2023 election NPF nungi toktepsang Major Retired Toshikaba-i metetdaksü. Nüburtemi pa nem maongka

agütsüra, lanur aser tetsürtem jenjang ajungketba mapatong balala inyaksü, defense academy ka lapoktsü, Mariani road ya Aor asoshi taküm lenmang lir, anungji, ibai mapa kümtetsü asoshi lenmang bushitsü, Milak ayong nung ya tzü temdangba (dam) ka yanglutsütsü, Longkhüm nung futsal ground ka den aluyimer atema cold storage ka yanglutsütsü, military intelligence nung inyaka aru asünung Naga yimden tebilemsü tsütsü teinyaksü khuret kanga junga angateta lir, pension yangluba maparen nung ochimashi aika aliba angazüker, anungji, item inyakyimtem yanglushitsü, pa MLA adokra ita nung anabenbo constituency semdangi arutsü aser ano teinyaksü kar lemsatepba liasü.

Koridang ya kechisarena asoshi tongtibang tesem ka nung amenoka lir, aser iba constituency ya Mokochung head quarter anasa lir, anungji, lenmang sentaktepba (road

connectivity) ji asenok asoshi tongtibang ka asütsü aser yangi rongsen kümtetsüsa (resources) kechisa lir, item jagi Koridang renloksü asoshi lenmang balala bushia inyaksü, iba ya regional mungjen ka asünung, nübur aginüba ama inyaksü merangtsü, ta Independent candidate Imtiwapang-i metetdaksü. "Kü indang election tamaitüsü noksa (symbol)-ji torch light lir aser ni ya constituency sanger asoshi tesangwa yaloktsür ka sünür, anungji, kü nem yimlibilema maongka agüjang" ta paisa mepishia metetdaksü.

Sentong nung candidate meina arur nisung kaka nem mapang tatsütsü agütsü. Khensa Village Council Chairman, I. Alemmeren Longchar aser Senso Mungdang Tir, Purwati nadia shilem agia sentong ayongba nükjidong lemsatep aser Khensa yim süngkümshi nung candidate aser nüburtemi election mapang meteta alitsü asoshi nungdak kar metetdaksü.

Dimapur nung Birla Open Minds school ka lapok



Dimapur, March 28 (TYO) : Tila tanurtem kaketshisatsü angazük tenzüka mezüng anogo nungi parnok shisatsü aser tokolok shitak lapokdakja taküm lenmang shitakleni anitsü tangatetba aser nükjidong yur tenzüka kaketeju ka tenüng agi, Birla Open Minds Preschool ka Toulazouma, Dimapur nung tanü küptoknü March 28 nü lapokogo.

Birla Open Minds School ya school ka dang masü saka linük ajaklen iba kasa school-tem ya lapoka lir . Tanü iba School lapokba sentong nung

jembidang, School Director, Wr.Bendangrenla -i " iba school nung bendang agüja sayutsü renemteter aliba tesayurtemi tanurtem dang kaketshisatsü dang masü saka taküm junga lia aotsü nungdakba jakla yimya aser sobalibatem sayutsü," ta metetdaksü.

Iba kasa sentong nung Birla Open Minds nung Franchise Relation (Northeast), Manager Wb. Avinava Brahma-i jembidang ashiba agi " Birla teloki lapokba school yabo akhi tesayuba nung tatidang agi tanur ka tangazükba bendanga

yimya nung masü, saka tanur shia dak aketba sempet aser tashi reprangteta tajung kümdaksütsü merangba tesayuba yimya nung tesayur tajungtemi tesayuba agütsütsü." "Onok school nung yabo kaket dang azüngtsüba masü saka mapa ajanga tangazükbatem alitsü," ta paisa ashi. " Tang tashi nung Birla Open Minds School ya linük nung state 24 nung school 300 dak tali lir , " ta paisa shisem.

Tanü Toulazouma nung lapokba Birla Open Mind School nung tang ya admission agi tenzükogo aser class April 14 nü nungi tenzüksü sentong lir. Tang nungi tenzüker asünungji, tanur tila küm 2 nungi 4 tashi purtem nem angati sayuba sentonga dena lir.

Tanü iba kasa sentong nungh Toulazouma nung yimten aser arogo lenirtemia shilem agia liasü, Iba sentong nung menden Birla Open Minds Preschool nung tesayur Moanaro liasü aser kasa school nung Center Head, Liviholi Chopi-i tepelaba metetdaksü.



March 28, 2026 nü Kolkata nung Union Home Minister Amit Shah-i TMC sorkar anema 'charge sheet' sayaba noksa nung angur. Kasa noksa nung West Bengal Assembly nung opposition lenir Suwendu Adhikari, Minister of State Sukanta Majumdar aser State party Tir, Samik Bhattacharya nungera angur.

Tanurtem atema social media tenokdangba Parliamentary ludeni pusemer

New Delhi, Metsüremi/ March 28 (Agencies): Parliamentary committee kati Centre sorkar dang arrshi küm telatet yur social media tenokdangba alitsü atema benoktsü.

Alima tesem aika nung linüktemi tanurtem anema social media tenokdangba benoktsü atema jembiba mapang ka nung India nunga iba tebilemtsü atema jembidar.

Parliamentary committee-i tanurtem arrshi küm telatetji kwi asütsüar memetdaksü, ajisüaka iba tenokdangba ya tanurtem aser tainlonglongpurtem atema asütsü.

State kar densema India tesem balala nung aikati arrshi küm telatet yur tanurtem atema social media tenokdangba alitsü atema kanga bulua jembir.

Parliamentary committee on communications & information technology nung tekolakji BJP

MP Nishikant Dubey lir. Iba committee-i report ka renemogo aser Hombarnü Parliament nung ibaji benoktsüa akok, ta telung osang ka ajanga metetdaksü.

Committee-isa sorkar dang Artificial Intelligence (AI) tim masüba nung amshiba nokdangtsü atema ozüing tesahi ka benoktsüla, ta shiogo.

Committee-isa Artificial Intelligence tim masüba nung amshia senotsü tsütsü ashikülak mapa inyakba, amokmerenba, taila audio aser video amshiba tebilemtsü metetdaksü.

Parliamentary committee senden nungji züngsemtemi cyber crimes tebilemtsü atema- a jembidang iba ya nokdangtsü atema ozüing tesashi ka nüngdak, ta bangjem.

Tang item ama ken otem ya Bharatiya Nyaya Sanhita aser IT Act kübok lir.

Committee-i, "AI ya timi amshitsüla ta committee-i

bilemer. Artificial Intelligence tim masüba nung amshiba nokdangtsü atema linük aikati ozüing tesashi benokkogo. Onoki sorkar dang AI tim masüba nung amshiba nokdangtsü aser AI tim masüba nung amshiba nungi nisungtem kümzüksü atema arrshi küm telatet yur social media sabang karbo nokdangtsü mepishir," ta metetdaksü.

Andhra Pradesh aser Telangana state natibo arrshi küm 16 ser tekübokpurtem nem social media mamshidaksütsü atema telemtetba agia inyakdar, ajisüaka tang tashi nungbo linük sasep nungbo tenokdangba mali.

Parliamentary committee-isa Ministry of electronics & IT dang AI indang specialised studies aser courses asadangtsü aser linük tesem ajaklen data centres aser AI Labs amenoktsü mepishia metetdaksüogo.

UAE nung ballistic missile tejaksa ajanga India nunger 5 yiru

New Delhi, March 28 (Agencies): Honibarnü UAE nung air defence systems ajanga ballistic missiles anüing tom nung nokdangtetba sülen missiles tejaksaji Khalifa Economic Zones Abu Dhabi (KEZAD) nung tsük, ta ketdangsertemi metetdaksü.

Abu Dhabi Media Office-i social media post ka ajanga, missiles tejaksa tsükba ajanga India nunger pongu yiruogo, ta metetdaksü.

Kasa sangdong ajanga,

"Tim ketdangsertemi nüburtem dang official osang dang amangtsü aser olulu meproksü mepishir," ta metetdaksü.

UAE indang air defence systems ajanga ballistic missile ka nokdangtetba sülen KEZAD anasa missile tejaksa tsükba ajanga tesem ana nung mi lendong ataloka liasü.

Brihostibarnüa UAE nung ballistic missile tejaksa tsükba lendong nung India nunger ka densema nisung ana asü.

UAE nung aliba Indian

Embassy-i India nungertem asüba atema mangyimer, ta metetdaksü.

"Embassy-i akokba tashi teyari agütsütsü atema UAE ketdangsertem den tongtepratepa inyakdar," ta Indian Embassy-i X ajanga metetdaksü.

Abu Dhabi Media Office ajanga ashiba agi, iba lendong nungji Pakistan nunger ka asü aser yirur asem rongnung India nunger ka densema liasü.

India-i West Asia tensa agi kongshiba tashi itta tizüktetdar: PM Modi

New Delhi, Metsüremi/ March 28 (Agencies): Honibarnü Ato kilonser Narendra Modi-i, tang West Asia nung rara adoka aliba ajanga tayongzükba balala ajangshibaji India-i tasü itta tizüktetdar, ta metetdaksü.

Jewar nung Noida International Airport semzüksüba sentong nung jembidang Modi-i, sensotem kümzüksü atema sorkari nüngdakba mera ajak agia inyakdar, ta ashi.

"West Asia nung ita ka dak tali raraa arudar. Iba dak sendakba nung tayongzükbatem India-i tashi ajak agi tizükteter," ta pai ashi.

India-i totzü tazü aser gas atema West Asia dak metaloker, ta shia Ato kilonser Modi-i, "Iba khuretji kibongtem aser aluyimertem nem mebandaksütsü atema sorkari nüngdakba mera ajak agia

inyakdar," ta metetdaksü. Airport tasenba dak sendakba nung pai, "Viksit Uttar Pradesh aser Viksit Bharat atema tanü otsü tasen ka tenzüker," ta ashi.

"Iba airport ya ajanga tesem nung rongsenkettzüng dak sendakba maongka aika angutsü. Noida International Airport ajanga Uttar Pradesh anüolen tsütsü aluyimertem, tilateri shishilembartem aser lanurtem atema maongka aika lapoktsütsü," ta pai ashi.

Iba sentong nungji Modi den Uttar Pradesh chief minister Yogi Adityanath aser civil aviation minister, Kinjarapu Ram Mohan Naidu na densema tongti ketdangsertem aika liasü.

Iba airport mezüngbuba shilem nung sen crore 11,200 indoktsü. Iba airport den gari lenmang, train lenmang, metro aser regional transport systems sendakteptsü.



March 28, 2026 nü France nung G7 Foreign Minister tem senden nung Union External Affairs Minister S Jaishankar (ajichi), US Ambassador to India Sergio Gor (tiyong) aser tangartem tangokba noksa nung angur.

Israel inyaksangshi aitsütsü atema PM-i tasü maiter: Jairam Ramesh

New Delhi, March 28 (Agencies): Honibarnü Congress lenir aser general secretary in charge of communications, Jairam Ramesh-i, Israel-i occupied West Bank nung ambangyima inyakba aitsütsü atema Ato kilonser-i tasü maiter, ta aitsü.

Jairam Ramesh-i X ajanga, tang West Asia nung rara ajanga Israel-i "Greater Israel" mangdang atema inyaker, ta metetdaksü.

"US aser Israel nati anünglen nungi bomb amshia Iran amak tanzükba sülen anogo 28 jungogo. Tesüiba hopta pezü tsiungda alimai Strait of Hormuz aser Gulf linüktem nung energy infrastructure dak dang ranglokba mapang nung Israel-i maneni (i) Gaza nung alirtem anema inyaker; (ii) southern Lebanon nung litsü atsüing tanzükogo; aser (iii) West Bank atsünga agitsü atema telemtetba agia inyaker," ta Ramesh-i metetdaksü.

Paisa, "Tang West Asia nung rara ajanga Israel-i Greater Israel mangdang ataloktsü atema inyakba den Palestine linük malitsü atema inyaker," ta metetdaksü.

Taoba ita Ato kilonser Narendra Modi-i Israel semdangtsü lia anogo ishika jaldang Israeli Cabinet-i telemtetba ka agiba Ramesh-i metetdaksü.

West Bank tesadang shi nung land registration agizükogo, aser iba ya 1967 sülenbo tang mezüing lir.

Congress leniri, iba telemtetba ajanga Palestine nunger lakh aika ali temeden makai akümtsü, ta metetdaksü.


"Modi-i Israel toktsür aruba sülen anogo ana dang lir US aser Israel nati bomb amshia Iran amak tanzüka liasü. Pa aji (Israel) tonga maodang anogo ishika jaldang Israeli Cabinet-i occupied West Bank tesadang shi nung land registration agizüker liasü," ta pai metetdaksü.

"Ibaji ajanga Palestine nunger lakh aika ali temeden makai akümtsü, ajisüaka Modi-i ola adoktsü aser pa tembar tajung Benjamin Netanyahu (Israel Ato kilonser) den ochi jembitsü atema pai tasü meittetter," ta Ramesh-i metetdaksü.

Israel-Palestine ken o dak sendakba nung mapang shia Congress-i sorkar aitsür.

Taoba ita Ato kilonseri Israel semdangba atema Congress lenirtemi pa sashia aija liasü.

Israel sepaitemi maneni Gaza nung civilians amaker, aser alima linüktemi Israel-i Gaza aser West Bank nung ambangyima inyakba atema Israel aitsüba mapang ka nung Modi-i Israel semdangbaji tasü mait tatishitsü lir, ta Congress lenirtemi aitsür.



March 28, 2026 nü Chennai nung osangbenertem senden ka nung Amma Makkal Munnetra Kazhagam (AMMK) General Secretary, TTV Dhinakaran den party nung lenirtemi assembly election atema party manifesto sayadang tangokba noksa nung angur.



TIR YIMYIM YIMOBILEM (EDITRIAL)

DIMAPUR SUNDAY, FEBRUARY (METSUREMI) 29, 2026

Mebilemba mapa aser mapang

Anogo ishika jakdang, Yisu Khrista gado rongdong nung mener Yirusalemi aiba anogo nung, iba gadojia ali nung majemdakdaksüi sü aser sungdong nungi kongsangtem lepzüker lenmang nung lemstüba anogo nungbo, ashiko nütsüngtem teranaprongla Yisu amenba gado jakdangji mesüra iba anasaji külem-külemi aotsü merangertem tiemba ser südi ta nükla dangi arua bilemer. Iba anogo nung telok ajaki Yisu Khrista tenüng sanga 'Hosanna' ya ayimten. Telok ajaki pa tushia ayimtener aser Pa pukümer dang asünungji nütsüngtem ajak tasütait, tamang nung takang aser kodanga Yisu toktsür maotsü aser majentsü purtem ama liasü. Aji oda, iba ama Yisusalemi takok ngua irr külenang, ano Yirusalem tenla kidang shishilembartem menden ajak meküpdokja aridokaka, Pa anema nokdaker shinga mali asü. Iba ama takok anguba anogo nungbo nütsüngtem ajak temulung tulu, tasü tait aser temulung lemtettsüba purtem amai dang liasü. Aji oda, anogo ishika sülen parnok ajak külemi temaba takdang ka nung kümteetsü benjong achiba mapang, Yisui Pa nütsüngtem dang parnok rongnung kati pa ashioksütsü ta ashi dang, nütsüng shia jagi, " Kibuba, nibo na mashioktsütsü," ta nangzük. Peteri balaka, ajaki Pa toktsüaka, paibo tatem tashi pa sülen anidaksü nangzük. Iba aonungjibo, takok manung temaba takdang nung benjong alir asünungji, nütsüngtemi parnok jakdang aruya aliba timtem aser tatidang indangji kenyongi parnok mulung nung tebilema mebilem. Parnok ajakji Kibuba den temulung lemlema shisamebului, iba mapang amajisa teti alitsü amai bilema liasü. Ajisüaka, kodang Gethsemene atsüki nung parnok nütsüngtem rongnung kati parnok Kibuba Yisu Khrista ashioksü aser Yihuda nunger telok tulu kati Pa pua bener ao. Idangjibo, anogo ishika jakdang, Yisu tenüng tushia 'Hosanna' ta ayimtenertem to kata mali asü. Iba mapang nungbo Yisu jakdang aser Yisu anasa nokdakner nütsüngtem shinga mali asü. Yisu Khrista sülen, nükpoker,tsüngtsüker aser shirangertem anepja senzüdang aser ango ana aser amtsük pongo agi nisung meyerijang pongo dak tali tebok sünga chiyongdaksür anungba anogo aser mapangtem nung nütsüngtem shinga mulungjang nunga kenü anogobo parnok dangi iba ama tetsübu aser lendong timtem arutsü ta tebilema mebilemi liasü. Alima nübortemi Yisu Khrista pur mezüngmeshia kangki nung angenloktsü tashi ataloktsübaji parnoki kenyongi mebilemba mapa ka liasü. Ajisüaka, Yisui parnok dang jelia shiadokba o ka asenoki Yohan tapu 15:18-21 nung shia angutsü. Iba Lai nung Yisui Khristai Pa nütsüngtem dang alimai Pa dang masü saka parnok ajak sempatsü aser reshikangtsü ta shia angur. Iba kasa tiaji iba aonung Gethsemene nung Yisu pua bener aoba mapang nungi nütsüngtem dak atalokba asenoki angur. Iba kasaji, asenok dak timtem matalokdang mesüra tatidang majurudangbo, asenok ajak ya Yisu nütsüngtem kecha shisabolu maka, nümadangtetdangteta temaba takdang nung Kibuba den külemi benjong chiyongerang mesük. Asenok ayongayonga tenla kidangi aodang mesüra sarasadem mapang agidangbo, asenok ajaki Kibuba Yisu kodang medoktsütsü amai bilemer aser tangar danga sayur. Ajisüaka, kodang senotsü tsütsü tatidang arur, asenokibo Yihuda Iskariot dang nungi jenjang teimba agi Yisu ayoker. Aji oda, kodang ajak atsüngzuka orr, Yisu Khrista atalar dang kümdir, idangjibo asenoka Peter amai kodanga sentepi moudang ama, kodanga sarasadema mesüdang ama aser kodanga temulung meyipa kuli mesüdang ama akümer. Atangji, Yisu Khrista nütsüngtemi dena Pa dena ashioksütsüsa mesüra Pa toktsütsüsa ajuruba tiaji asenokia metizüktettsü, Ibaji Kibuba Yisu Khristai meteta lir. Iba jagi Pai jelia asenok kümdangshidaksür. Iba o ji asenoki tenoka angara, asenoki timtem,lendong aser tatidang ajak tizüktettsü. Iba tashiji angudak asen den teyarir teti dena lir, aji Ochi tanüla aser iba tanülaji asenok dangi yoktsü Yisui nangzükba asenoki Yohan 15:26 nung angutsü. Iba teyarir tanüla jagi asenok tasü aser tashi itdaksür. Iba Ochi tanüla tashi nung asenoki meimlaba takok, temoatsü, taneptsü aser tesünep angutsü.

OLEMSABANG

AOMONGCHEN OTSÜ

~ Temjenyuba Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Talila Teyangluba telok: Otsü obu nenati tetenzük dang ashi ama ali rongsen amer bushiaka mesüra molutettsü merangaka kecha agia matongba shisatsü tanü onoki ngutetoko, iba ya amer alima matsüngdang ku ayakji sayutsü. Kangasa pelaro.

Wazüktet telok: Otsü obu Onok telok tenung Wazüktet shisaluyimer telok nungi Onok ishikati lir, aser ni anüolen tip nungi lir. Iba ama tongtipang aser senti sentong tulu ya onok dak malangba ka otsüla nenati achaayangdaksüba atema kangasa pelar. Kodang nenati youkba shiti to onok ket atong onok atema tepelatiba anogoji iba anogo to liasü. Aser ibai kodangang mapangi tonga arutsü tasür yongyasete sobaliba metetba lanu asensortem indangji ano tejangjaba nung longro amai roteta tali temerangba takangba nung metetnüba agi aser tarutsu asen Aoer kin asoshi angazuka aser wazüka yunüba agi pelasete aruba lir.

Otsüla: Iba telok yabo tesüngmangtsüka kodanga nibo yamaibo meimla, molutzü adena or alirbo memesük, ishika dang süaka pei tera mamadoki amita alirtem. Tebu nibo tangang temelung ali alur parnoki ashiba ola osü ajakji ajiangjo tsürapuri atep nungi sayutetta aniba telok ya sayur, parnoksa nisung ishitiba süaka teimla tila kabo oda lir ta sayur. Haoja to! Paika rongnungi item lanur ishika ya danga angudang item ya asüng Aomongchen yimer aser Ao kin nükrangdongji ya asütsü. Tesüngmangtsü ka aser jangratemtsü ka tenüng nung jaloka item chichiba wazüktet shisaluyimertem yagi Aor Ayakji wazüka yutettsü. Ayah! Ni pelasete, amang teyong nung milen sangwa tila ka angu medem, ni nemjemsete aser temolung shirangsete aliba mapang ka nung chichiba sayutetba chirtem, parnok kakat shisatsü aika amena bener aser pei tera tejangja wazüka bener nisung kar angudang ku molung anisüngzüker. Atangji nung ajakbo kasa masü, aika rongnung tsüngchi tsürabur aser lanur ishikabosa aliba metetdang Tsungrem tenüng asanger.

Obula: Hao iba telok yabo junger, nia tangang temolung anisüngzüker. Oh lanu asensortem nenok ajaki khen angang nenok tazüngba temetebajibo Tsüngremer ketsanga dena züngdangtetsüsa liaka ya metetang "tangari na alima shisatsü metetbaji masüngdangtsu saka mezung na tenüng shiba, netsü nebu tenüng shiba, na kechi yimer aser kechi kin, kechi kidong ibaji mezüng asüngdangtsü." Oh ku molungjang ajungai bilema aser meima aliba lanu asensortem, ibai otsüla kena indang sentisep tanü asoshi yamai agütsüner, yimibilema tenok tenoka angangangma. Na alima talangtiba , tesademtiba nungjia liynga oakasa nai ne sobaliba tera memetetra naji terata aser mejangjaba telokdi rongnung nisung ka dang asütsü. Ne temeli ajak anep anepa yanglua ainer oji jembiaka nai ne sobaliba amadokra naji ainer ka dang ta metetang. Nai ne tetsü oshi sendoka doktsür alima den sakoko temesünger oshi aser lenten lima alir oshiji jembia aotsü akok, aji agi na tanü putu nisung ta sayur saka naji tetsüngtaba, tangari mezüngokba nisung ka dang asütsü. Ne dak chichiba ayak ka mali asütsü ta temolungjang nung yuangma. Maneni iba senti sentong asalentong atongla, azü ajak agi nenok lanur asoshi bilema otsüla bendenloksema shia iba sentong atemtsü. Tarutsü nunga arishia lira maneni iba angazükba aser sensaksem agiyonga aotsü.

Otsüla: Haoni! Obulai ashiba otemji nenok molungjang nung ringzunga yur benshia oangma. Ano maneni otsüla olen kar inoksemma shir asenok tanü asoshi sentong ya tatem kummer " Oh! Tashi temetet agi toktepa aliba putu tasenba lanu asensortem, nai anüng petinu ajak takzüteta, alima meimchir aser tashi ajak anokshia shisatsü balala yangluloka nai nasa tulutiba aser tongtipangba ta bilema liaka; nai na ajak abensar ama bilemaka; nai ajak tongtet ama bilemaka; saka nai na arulen, naji shibar ner chirtem dang meshitetra, ner oshi jagi otsü obula nunger otsüji meshitera; Alima nung na nanüng dendaktsüba olatem rongnung ka dang asütsü. Na rataseta, kecha memeteti alinung, nai maneni terataba aser kecha memetetba chirnur putu ka anitettsü. Na aruba, jakzükba, jayajako, oshioben, sobusolemtsü, temaitsü, otsü kechisarenaji tejen putu indang, item ya süiadokoko ta nai ashitsu akok, asen sobalibaji akhi ta ashitsu akok saka itemji paidoktsü makokba ne tera aser ayak. Ibaji na shibar , kolen nungia jangjadaktsüba ne leniba ajok." Anungji tanü alima putu tasenba nung nai senzuka doktsüra tarutsü ayatai. Ya metetang,"Ibai nai samadaktsüra, na tesama, ibaji nai amadokra nai ne sasa amadoker ta teti bilemtetdangma."

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

YISU YIRUSALEMI TAKOK NGUA AIBA

~L. Kika Pongener

Kechiba Yisu Yirusalem-i takok ngua ayiba anogo dang 'Palm Sunday' ta ajar ? Middle East limatem nung kanga bulua aliba asangdong; iba tu ya tereprangtsü nung tekabu (Palm) amai lir. Otsü agi ashiba agi, tejen putu nung benshiba yimsu (Tradition) kaji...Iba asang-tu ya tepela aser takok anguba temaitsü nung amshi. Yisu Yirusalemi takok ngua aiba anogo nung...Kodang pa Gado ka nung mener Yirusalem tonga ao; telok tulu ka Hosana ! Hosana ! Kibuba tenung nung shiba arur pa sangang....ta ayimdena tushia pa sulen anidak. Telok rongnung kari pei su luzüka lemstsü; kari asang kongsang kozüka lenmang nung lemstsü; aser kari asang-tu (Palm) ammer Hosana ! Hosana ! ta tushia anidak.(Ibajagi Yisu Yirusalemi takok ngua aiba anogo dang 'Palm Sunday' ta ajar sudi ta rajemer).

Ano kechiba Yisu-i Yirusalemi takok ngua ayidangji Shidi (Elephant) dak mener mai (?) Shiruru rongnung Shidi-ji aküm taket shiruru ka....Shidi ya tejen putu mapang nungi chubatem chuba mendeni atuba mapang amenba; aser chuba yimli sema aodang mener jajaba shiruru ka. Anungji Shidi dak-ang akümketa mener aitsüba sernung....Ano Yisu-i kechiba Kor (Horse) dak mener mai (?) Shiruru rongnung Kor ya tashitait aser teküra shiruru ka....Kor ya rara nung tongtipang sua amshiba shiruru ka....Anungji Kor dak-ang mener aitsüba sernung....Saka Yisu-i Gado ama shiruru rongnung sorubangro tamajungtiba, khen ashitsübo matu-malum ta ashitsüba shiruru ka....Kiburi khu taret pai makoktsüsa oshitsü-nungdang apusoa aoba shiruru ka....Saka Gado ya ajemalu (Humble) shiruru ka....tangan den raratsü aser mangyangtsü jakla khenyongi maketba shiruru ka....Ibajagi Yisu-i iba Gado dakji dang mener ayitsü shimtet sudi....Kechiba sura, Yisu Yirusalemi ayiba ya alima chuba ka ama akümketa tashi (Power) tulu bener masü; raratsü nukjidong nung masü....Saka ajemalua yimjung osangtajung bener ayir....Ibajagi, Yisu-i Gado chanu ka dakji dang mener ajemalua ayi sudi ta rajema angateter.

Palm Sunday nung tatalokbatem nungi Tanela lesson kar :

1. Yisu Yirusalemi takok ngua ayiba anogo nung tatalokbatem ya jilia renema ayuba sentong ka masü. Gado-jia jilia kibur den jembitepa ayuba masü. Lokti tulu adenshiba-jia jilia osang sangdonger adenshiba masü. Aji oda, Tsüngrem sentong tataloktsü kechi shinzüka aka....Ibaji mapang tetemsu nung pa sasa jungkai atoker....Aser Tsüngrem sentongji alima tashi kecha agia nokdangtsü aser soita ayutsü makok....ta item tatalokbatem yagi sayur.
2. Yisu amenba Gado-ji kodanga nisungi memendangba Gado ka liasü. Tetezü....tasüngtet Gado ka liasü. Yisu-i shirnok temenen nungi pila-a asüngteta, merukteta, meshiteta alir...Parnok dakji aita alitsü mulunger.
3. Gado ya ajemalu shiruru ka; pa dak tangan yirutsütsü aser tangan den raratsüba jakla maket; Kiburi kechi khu benloktsüdir; ibaji khuji ola madoki tashi anga-a abener. Yamaji shirnoki Gado ama ajemalua tila küma ajak den yimjung nung alir....Parnok taküm nung Yisu-i Kibur küma alitsü mulunger.
4. Gado-ji sorubangro tamajung aser temeimtsü maketba shiruru ka....Saka kodang pa dak Yisu amen....nisung ajaki meimtsüsa küma-atok....Yongji, pa jajatsü asoshi kari asang kong kozüka lemstsü; aser kari pei su luzüka lemstsü. Aji oda, asenok kecha jenjang maka nisung ka asütsü akok....Saka asenok dak Yisu aita lira ajaki sapuba nisung ka akümtsü.
4. Telokti rongnung kari pei su luzüka lemstsü; kari asang-kosang kozüka lemstsü; aser iba manung Gado-ji jajadaksü....Yamaji shirnoki pei akaba tajungtiba agi mulungsoa Yisu tang tenlar....Parnok dakji Yisu aita linur.
5. Lokti tulu Yisu sulen anidakba rongnungji karbo tai apotsü anidak; karbo tashidak anepnuba agi anidak; karbo sayatenya inyakba repringtsü anidak. Tanü-a asenok tamangertema Yisu dak amangba ya kechi nukjidong nung amanger (?) Tashitak anepnuba agi asü (?) Tamanger tajunga ta sayutsüba asü (?) Pei tajanzük kar angutsüba nukjidong nung asü....???

Temeim amangbapurtem....Asenoka Yisu amenba Gado chanu ama ajemalua tila kümdi. Yisu Khrista asen taküm nung Kibur sudaktsüdi. Yisu Khrista asen mulungjang nung aita alitsüsa asüngteta, meshiteta, merukteta temenen nungi pila-a lidi. Asenok akaba tajungtiba Yisu nem agutsüdi aser asenok yimjung osang abener ka-ka sudi.

ANO GO ABEN TSÜNGREM DEN

TEMEIM AJANGA AREMZÜKBA

"Idakii chia nenok kadi ka asoshi temeimji tamakok maludaktsüi akanga sota yuang, kechiaser temeimi temenen jenti nembanger" - 2 Peter 4:8

Temeim ya asenoki kechi koda benshir, sayur, aser kadi ka inyaktepa aor? Alima nung NGO aikadi yimji yimjung lokti tenteta yimjung indang tesayuba agütsür, saka yimjung raksaba teimba pokteter. Yisu Khristai sayuba ama asenok ajagi temeim ya angatetra tanü asenok koda tesünep nung alitsü.

Taremzüka ya kanga tongtibang kechiaser kadi maremzükra kechi koda süra tesentaktep tajungi arutsü. Ajak dak alaka asenoki kanga sarasadema asen tsükchir, asen sempartem, asen mereprangnür asütsü akok parnoki kechi asenok dang tamajung, mesüra küpzükba maparen asütsü akok asenoki kanga bilemdanger asenoki Tsüngrem temeim nung ajemdaker aremzüka lira asenok ajanga yimjung poktettsü. Tila ka nung asenoki maremzükra asenok nungi rara tulu adoktsü alitsü, atangji asenoki tanü angatetsübaji, alima, nisungi yangluba temeim ya masü saka Tsüngrem temeim ya asenok mulungjang shia asotsüla aser iba Tsüngrem temeim ya asenoki kuli sütetsüla.

Asenoki kuli asütsübaji, aremzüksüla, tatok sayutetsüla, aria bilemstsüla, aser taochi sayutetsüla, "Idakji chia nenok kadi ka asoshi temeimji tamakok maludaktsüi akanga sota yuang, kechiaser temeimi temenen jenti nembanger"...

SARASADEM:

Oh Oba Tsüngrem, Ne temeim va onoki masadangtettsü alangii Ne temeim va ulura aser taochi agi sünga lir. Amen

Yirusalem nung Khristan school tem nung tesayurtem aika anentsütsü

Mach 28, 2026: Israel Ministry of Education-i tetuyuba tasen ka agütsüba ajanga Yirusalem nung Arogoi ketdangtsüba Khristan school tem aika nung Palestine nunger Khristan tesayurtem aikati timtem ajangshitsü, ta osang ka ajanga metetdaksü.

Israel Ministry of Education-i shidi ka ajanga school tem nung principals dang, taküm September ita nungi tenzüka tesayurtemji Yirusalem nung alitsüla aser tesayurtem ket nung Israel-i recognise asüba qualifications alitsüla, ta metetdaksüo.

Iba tetuyuba kübok West Bank nung aliba Khristan tesayurtembo mekongshir. Tesüiba küm aika Yirusalem nung aliba Khristan school 15 nung tesayur inyakertem ket nung permit lir.

Yaküm-a Education Committee of Knesset-i West Bank nung training agiba Palestine nunger tesayurtem school tem nung magizüktsü tetuyuba agüja liasü.

Khristan melungtet telok Aid to the Church in Need (ACN)-i ashiba agi, tang Israel Education Ministry-i tetuyuba agütsüba kübok Khristan tesayur 230

mapa makai akümtsü, iba denji külemi school aika takoksa angutsü, kechiyong school temi arrtsü adener aliba tesayurtem

aika anioka lir.

Iba tetuyuba kübok school shia nung tesayur 12 shi makai akümtsü, anungji kaketshirtema takoksa angutsü.

Yirusalem nung General Secretariat of Christian Schools nungi ketdangser kati, "Iba tetuyuba ya shidak benoka inyakra Khristan school temi timtem kanga ajangshitsü aser Khristan mission maitsü samatsü," ta metetdaksü.

Paisa, "Tesayurtemji melenzüksüsa Yirusalem nung Khristan tesayurtem peria mali. Iba tetuyuba ajanga mapang ka nungbo Khristan rejutem nung Khristan maitsü samatsü aser yimti nung Khristan tamang tashi meiti akümtsü," ta metetdaksü.

Yirusalem nung Khristan school temji teimbaka Aso 19buba tatembanglen Latin, Eastern Catholic aser Orthodox Khristantemi lapokba lir. Item school nung Khristantem dang masü saka Muslim nunger tanurtema aika azünger.

Khristan school ketdangser kati, "Iba ama tensa mapang nung Arogoi parnok sendoka meyutsütsü," ta metetdaksü.

Latin Patriarchate ketdangser kati, "School tem anema inyakba ya tarutsü tia anema inyakba den kasa lir," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Wangjang

(n) terokjang (larynx, Adam's apple)

* Nisung kar dakbo wangjang kukteta adoka alir.

Wangkak

(v) rungdoka awang (over burnt specially food items)

* Ango pongsen tali wangkaka arungba agi majung aküm.

OLONG PAITEP # 7458

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemasa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 7457 TELANGZÜBA

TIPIEN :

- 2. Yimten, 6. Aisü, 7. Jahaz,
- 8. Shin, 13. Meim, 15. Suyim,
- 16. Aiür, 17. Asüküm.

LANGTSÜNGLEN :

- 1. Injang, 2. Yehova,
- 3. Mezüng, 4. Nashi, 5. Rür,
- 9. Künsük, 10. Tzüyim,
- 11. Teimla, 12. Yimra,
- 14. San.

NAI-A YA METETTER



Tetsür football asayar kati mapang tekaratiba nung goal agütsübaji Maria McAneny (UK) lir. Maria ya Celtic Women club nungi asayar aser Scottish Women's Premier League nung Hibernian Women den asayadang second 4.10 nung dang lia goal agütsü.

Asaya tenzüksü whistle apoba den külemi Maria-i centre circle nungi ball metsüoktsü aser Hibernian goalkeeper adendanger goal ai. Iba ajanga "fastest women's football goal" naroküm angu.

JK Tyre-i NE nung Embedded Smart Tyres sayaogo



Kohima, Metsüremi/March 28 (TYO): JK Tyre & Industries Ltd-i Guwahati nung passenger garitem atema India nung mezüngbuba Embedded Smart Tyres sayaogo. Northeast India nung kanga dang kara renloka aoba automotive market ka nung iba intelligent tyre technology sayaba ya tongtibang jenjang ka agiba asütsü.

Tyre structure nung sensor tem enokja lir aser iba innovative tyre yagi air pressure, temperature, aser mopung leak asüba ajak track süteter. Mapang shitak nung osang agütsüba ajanga gari anirtem nem jenjang tapet agitsü asoshi teyari agütsü aser iba den gari kümsüka toktsür, tyre tajungba amshitter aser gari anitsü tajungba kümdaktsür.

Iba tyre ya Banmore, Madhya Pradesh nung JK Tyre indang advanced facility nung purapiteta

yangluogo. Iba next generation Embedded Smart Tyre ya tarutsü tenüngdakba peritsütsü asoshi company-i jenjang agiyonga aruba nung tesüsuba lir.

Tyre sayaba sentong nung o jembiba mapang Director - Sales & Marketing, JK Tyre & Industries Ltd. Srinivasu Allaphani, "India nung North-east nung aliba state tem ya JK Tyre atema tongtibang tesem ka lir. Idaki motorsport den onok mapang talangka sendaktepa aruba ajanga gari anitsü jangrartem aser customer tem den onok tesendaktep takang ka yanglutsü teyari agütsüogo. Iba tesem ya onok shishilembatsü atema tongtibang shishilembadak ka lir. Embedded Smart Tyres sayaba ya JK Tyre atema alizüng tasen ka tongtetba lir. Onok indang R&D aser manufacturing capabilities agi teyari agütsü iba technology yagi tyre nung indang indang

intelligence integrate sütsür aser tekümsüka kübok senzisenpongtsü teyari agütsü. North East state tem nung iba innovation sayaba ajanga iba tesem terenlok asoshi onok bendanga agütsür aliba sayur," ta ashi.

NE nung JK Tyre inyakyim maneni atsülanga odar aser iba ajanga North-east nung aliba state tem nem advanced mobility solutions bener arutsür. Iba Embedded Smart Tyre tem ya JK Tyre indang dealer network ajanga replacement market nung angutsü. Tyre ya inch 14 nungi 17 tashi nung angutsü, koba ajanga passenger gari aika ayimjemtsü.

Linük nung radial tyre technology sayaba nungi tenzüka intelligent tyre solutions yanglutetba tashi nung company-i maneni advanced engineering, research, aser sustainability-focused manufacturing nung sen entoka arudar.

JK Organisation indang flagship company JK Tyre & Industries Ltd ya alima nung top 20 tyre yanglurtem rongnung ka lir. Tang tashi nung company indang manufacturing facilities 11 lir, kong India nung 9 aser Mexico nung 2 amenoka aliba densema lir. Item facility tem nung küm nung tyre million 35 shi yanglur.

Assam assembly election atema candidate 722 lir

Guwahati, March 28, 2026 (Agencies): 2026 Assam Legislative Assembly elections atema nomination meyipa agiba anogo tembangba sülen candidate 722 anüngogo.

Assam nung constituency 126 atema candidate 815-i nomination papers 1,389 agütsü. Ketdangsurtemi nomination papers repringba sülen candidate 789-i tokteptsü temsüa lir ta bushitet.

Ajisüaka, nomination papers meyipa agitsü anogo tatembangbuba nung candidate 67-i tenüng meyipa agi aser

candidate 722 anüng. Külen, Assam nung election jakdang weapon surrender maparen inyakba nung tashi angar 65% lir.

Security agencies-i election mapang prangpong tim mesüi mamshitsü atema temai adokba telungpurtem aser licensed firearm holders dak tenük yoker. Tang ketdangsurtemi licence holders 30% shi dak tenük yokdar aser district-level committee temi nisung shia indang ken o asandangdar.

Security agencies-isa temai adokba telungpurtemi election

mapang tim masüba meinyaktsü atema tenük yokdar.

"Assam nung licensed arms 12,000 shi lir ta asandangteta lir aser iba nungi 70% agütsüogo" ta ketdangsur kati ashi.

2021 nungi Assam nung telungpur 9,000 dak tali temai adokogo aser parnoki prangpong 1,000 tema agütsüogo.

"Election mapang amshiba noktangtsü nükjidong nung licensed firearm holders dang prangpong bendanga agütsütsü tuyur" ta Inspector General of Police (Law and Order) Akhilesh Singh-i ashi.

Ukhrul aser Kamjong nung sepaitemi bunker 58 raksatsüogo

Imphal, March 28, 2026 (Agencies): Manipur kübok Ukhrul aser Kamjong district tem nung sepaitemi ozüngi memelaba bunkers 58 raksaa endoktsüogo.

Iba mapa ya Indian Army 8 Bihar Regiment, Manipur Police aser Central Armed Police Forces (CAPF) külemi yaritepa inyak. Naga aser Kuki nung telungpur teloktemi item bunkers ya yanglu ta tai tongloksür.

Ukhrul district kübok Mahadev Thoyee Ridge aser Zalengbung Ridge nung mita aodang bunker 52 raksatsü. Iba jakdang Litan aser Mongkat Chepu nunga bunker 6 raksaja liasü aser iba ajanga mepetmesü adoka aliba Litan tesem nung bunker teimbaka agienogo.

Sepaitemisa Lengiangching aser Mongkat Chepu yimtsüngtem nung bunker aika

raksatsüogo aser injang tazüng aika ngutetogo.

SEPAITEMAMAKER NISUNG 5APU:

Churachandpur district kübok Tuibong Bazar nung sepaitem amakba dak sendakba nung nisung pungu puogo.

March 25 nikongdang 6:30 ako meta Tuibong area nung sepaitem amenba Tata Winger gari ka lendong atalokba sülen mepetmesü adoka liasü. Gari tsüktepa sülen manen aser ibaji ajanga nübortem ain adok ta tenük agi angurtemi ashi.

Ajisüaka, ketdangsurtemibo Mine Protected Vehicle (Casspir) ya timi oya lia two-wheeler kati arua atsük ta ashir.

Iba mapang two-wheeler nung mena alir nisung anaprong yi agi mesepa jemer liasü ta ketdangsurtemi ashi.

Iba tatalokba sülen temeket nung alirtemi lungkak ait aser nisung kari mepetmesü adoktsü merangba agi Central Armed Police Forces (CAPF) garitem raksatsü aser public kiojen nung teka ai ta ketdangsurtemi ashi.

Iba mapang sepaitemi aika kanga mejungi yiru aser garitem raksatsü.

Iba ken o dak sendakba nung police-i nisung pungu-Lunmalsawm Sehlep (28), Haominlien Kipgen (28), Khaigoulien Haokip (30), Heminlen Haokio (23) aser Khupgoulen Khongsai (28) nung pungu.

Iba dak alia nisung 27 sota asüngdangya südar aser parnokia shilem agia lira ozüng tapet kübok merenshitsü ta ketdangsurtemi ashi.

Houthis teloki missile amshia Israel amak

Sanaa, Metsüremi/March 28 (Agencies): Yemen nung amendaker aliba Houthi teloki Israel dak missile aika khaloktsüogo. United State aser Israel nati Iran amak tenzükba silen tang mezüngbuba parnok Israel makogo.

Houthis military otongdar Brigadier-General Yahya Saree-i, parnok Israel amakba osang ya Honibarnü parnok indang Al Masirah satellite television ajanga metetdakja liasü.

"Taoba mapang armed force temi sangdonger aliba nukjidong matalok tashi aser tesem ajak nung resistance anema jenjang agiba maneni tashi onoki Israel maneni amaktsü," ta Saree-i metetdaksü.

Israel military-i ashiba agi, parnok missile ka khadanga liasü.

Hokolbarnü Saree-i sangdong ka ajanga Houthi pura Middle East ajunga anakshitsüba aser alima rongsenketzüng nung kongshiba iba rara nung adentsü ta ashiba sülen ghonda ishika lir Israel makogo.

Saree-i Honibarnü ashiba agi, parnok southern Israel nung sepaitem amenoka aliba tongtibang tesemtem dak ballistic missile aika khaloktsüogo.

Iran aser Hezbollah nati Israel dak maneni missile aser drone khaloktsüba mapang Beersheba aser Israel indang nuclear research centre tongtibang temeket

nung tang agi tasembenbuba Hokolbar aonung aser Honibarnü anepdang tashi nübürtem küm danga alitsü atema siren ola agüja liasü.

Houthis puri 2014 küm nungi Yemen yimtüba Sanaa atsünger lir, aser parnok tang tashibo US-Israel rara nung shilem magi aruogo.

Israel aser Hamas na raratepba mapang iba telok yagi Temerem tziyim nung rongtem amakba ajanga tetsü daksü tulu adokdakja liasü. Iba tzi lenmang ya ajanga küm shia USD trillion ka alang osettsüt shibelener.

2024 küm Trump administration-i Houthis pur amak koba hopta ka sülen anena liasü.

Houthis indang deputy information minister Mohammed Mansour-i Honibarnü local media dang ashiba agi, "onoki shilem balala küma lemsar raratsü aser Bab al-Mandeb strait shibanga ayutsü asoshia sentong lir."

Sanaa nungi Al Jazeera osangbener Yousef Mawry-i ashiba agi, Israel dak sendaka aliba rongtem Bab al-Mandeb strait ajanga mesenzü daksüba ajanga Israel rongsenketzüng nung kongshitsü, kechiyong Israel indang import shilem 30 shi Temerem tziyim nung iba lenmang ajanga arur.

Doha Institute for Graduate Studies nung Media Studies indang professor Mohamad Elmasry-i ashiba agi, Iran

pusema Houthis puri iba rara nung shilem agiba ya kanga dang tongtibang lir.

"Onoki taoba küm ana ser tasadang tsüngda Houthis pur koda tashi tait aji nguogo," ta Elmasry-i Al Jazeera dang ashi.

"Parnoki Bab al-Mandeb strait, Temerem tziyim aser Suez Canal shibanga ayutsü asoshi jenjang agira Strait of Hormuz densema tongtibang lenmang ana shibanga ayutsü," ta pai ashi.

"Item ya international shishilemba atema rongtem senzüba tongtibang lenmangtem lir, anungi iba ya kanga dang tongtibang asütsü," ta paisa shisem.

Kasa mapang nung occupied West Bank nungi Al Jazeera osangbener Nida Ibrahim-i ashiba agi, Iran aser Hezbollah na den rara den ano linük tanga ka nung rara tenzükba ajanga Israel nung sorkari rara achaayangba dak sendakba nung tasüngdanga aika adoktsü.

"Gaza nung rara mapang Palestine nungertem pusema Yemen-i rara nung shilem agiba mapang Israel-i telangzüba agütsüba ama tanga telangzüba agütsütsü imlar," ta lai ashi.

Tanga tatalokba ka nung southern Lebanon nungi rocket ana yokba sülen Israel nung sepaitem teku yiruogo, ta Israeli Army Radio-i Honibarnü metetdaksü.

NÜBURTEM NEM METETDAKTSÜR

28Koridang AC by-election mapang item tetuyubatem ajang ajanga benoktsü:

1. Village council nungi jelia temelaba magi-i bendangertem shinga Mangmetong yimtsü aittsü memelatsü. Aibelenertem merenshitsü.
2. Yimtsüng telongtet nung telungpur telok shinga election dak sendakba nung ken o nung shilem agitsü mesüra minprongtsü memelatsü. Tetuyuba sülen manidakra Mangmetong Village council-i item teloktem den teka amteper minyaksü.

Mepetmsü kecha matoktsü aser yimtsüng yimjung nung toktsütsü nukjidong nung iba osang ya sangoktsür.


(WATI JAMIR)
CHAIRMAN


(KIKA IMCHEN)
SECRETARY

MANGMETONG VILLAGE COUNCIL

MANGMETONG VILLAGE COUNCIL

EMERGENCY SALE

Ali tesazük 106000sqft shi nung rubber tong 500 shi tang teyimdak (harvesting)

TAYOKTSÜ

Tuli Paper Mill (Tzüdikong-Amguri Road 10th Mile nungi furlong ka shi pilar lir. Talitsü ki (RCC), smoke house, rubber machine aser osettsüset ajak peria lir. Jenjang Rs.50/sqft only (slightly negotiable) No Broker. **Contact: 9615445779**

LIR

Taoba Nepal Ato Kilonser K.P. Sharma Oli puogo



Taoba Nepal Ato Kilonser KP Sharma Oli Honibarnü Kathmandu nung apuba sülen police temi anir aoba noksa nung angur.

Kathmandu, Metsüremi/ March 28 (Agencies): Taoba Nepal Ato Kilonser K.P. Sharma Oli Honibarnü puogo. Taoba September ita Gen Z puri linük nung ochi mashi inyakim anema longkak aitba mapang nisung aika asüba menokdangtetba atema police-i tang bushisüngdanga aliba mapang pa puogo, ta ketdangsürtemi metetdaksü.

Pa kübok home minister inyaka alisang Ramesh Lehhak-a puogo.

Rapper aliba nungi yimden yimsüsür akümsang Balendra Shah Ato Kilonser akümba sülen anogo ka lir tena ya puogo. Longkak aitba mapang azütokshi lendong atalokba bushisüngdanga lokti tentet kati taoba hopta parnok ya parnok mapa sentoka toktsüba atema obendangtsü benokba sülen puogo.

Sorkar anema longkak aitba mapang anogo ana tsüngda nisung 76 tepset aser iba sülen Oli mapa nungi anena liasü.

Police otongdar Om Adhikari-i ashiba agi, Oli aser Lehhak naprongla Kathmandu Police Office nung sota yua lir

aser Deobarnü okadaki anir aotsü. Nepal nungbo Deobarnü ya mapa inyakba anogo lir.

"Bushisüngdanga committee-i benokba sülen onoki parnok puogo," ta paisa shisem.

Arishi küm 74 tain Oli, shiba taoba mapang tezüng anaprongla transplant süa liasü, pa police office nungi mozüki-i anir ao ta tenük kuli agütsürtemi ashi.

Pa okatsür Tikaram Bhattarai-i Reuters dang ashiba agi, pa apuba ya temelaba maka apuba lir.

"Parnoki pa bushisüngdanga atema apu ta shiogo. Iba ya ozüng alema aser tim masü, kechiyong pa jena aotsü mesüra tasüngdanga nungi jenshitsü kecha madoker," ta pai ashi.

Longkak ait tenzükur mezüngbuba anogo sepaitemi injang khaloktsüba mapang Gen Z pur longkak aiterem 19 tepsetba ya nokdangtsü atema kecha jenjang magiba atema iba committee yagi Oli aitsü.

Iba tatalokba ajanga Shah-i aniba Rastriya Swatantra Party-i iba ita agiba election kanga junga koktetogo.



FOOD SAFETY DURING MONSOON



Eat Safe Food:



1. Wash fruits and vegetables with clean water before cooking.
2. Cook and reheat food thoroughly before consumption.
3. Do not leave cooked food at room temperature for more than 2 hours.
4. Refrigerate all leftover food and perishable food items (preferably below 5°C).



Keep Kitchen Clean:



1. Wash & sanitize all surfaces & equipment with disinfectant before preparing a food.
2. Clean your kitchen floors with hot water & disinfectant.
3. Wash & clean your utensils thoroughly & dry them before storing.
4. Clean your fridge inside out & defrost it every two weeks.



**State Food Safety Authority,
Department of Health and Family Welfare, Govt. of Nagaland.**

Miami Open: Jannik Sinner aser Jiri Lehecka na final asayatsü



Jannik Sinner aser Jiri Lehecka

Metsüremi/March 28, 2026 (Agencies): Italy nungur world number two Jannik Sinner-i tanga asaya aliba Miami Open nung maneni kanga junga asaya-a Hokolbarnü fourth-ranked Alexander Zverev koka final tongtetogo, kong pa Czech nungur Jiri Lehecka den asayatsü.

Arishi küm 24 tain Italy nungur asayar yagi Germany nungur asayar Zverev 6-3, 7-6 (7/4) agi koka Masters 1000 asayamung nung asaya 32buba atonga kokogo.

Grand Slam pezü tashi koker aliba asayar Jannik Sinner yagi hopta ana tejkadang Indian Wells semi-finals nunga Alexander Zverev kokogo aser pa küm asem tsüngda Miami Open anabenbuba akoktsü merangdar.

2017 küm Roger Federer

sülen küm ka nung Indian Wells aser Miami Open na koka "Sunshine Double" akokba mezüngbuba asayar akümtsü atema Sinner merangba mapang lir.

Tanga semifinal asaya ka nung Lehecka-i France nungur asayar Arthur Fils amokbanger asaya-a asaya 6-2, 6-2 agi ayong ayonga koka liasü.

Sinner aser Lehecka na tang tashi nung asember asayar lir aser asemberprongla Sinner-i koker lir. Lehecka-i Sinner den asaya nung set ka danga koka mali.

Asaya nung mezüngbuba set nung Sinner-i Zverev indang serve ka break süa pa 3-1 agi tejkadang aküm aser asaya minute 42 nung dang kokatok.

Tanabuba set nungbo asayar kati danga serve break mesütet aser tie-break asayaba sülen

Sinner-i asaya koka liasü.

Sinner pa indang career nung tang agi asayamung 26buba akoktsü merangdar.

Kasa mapang nung Lehecka, shibai asayamung tepeyong nung set ka nung danga tamakok ngua mali pai Fils indang serve pezü tashi break süa minute 75 nung dang asaya koka liasü.

Lehecka final atongba sülen pa taruba hopta rankings sayaba mapang jenjang ti tejkadang tua 14bubai atutsü aser asayamung kokra 12buba atongtsü.

2024 küm Adelaide aser 2025 küm Brisbane nung ATP title abenba sülen pa ATP title asembuba abentsü meranga asayadar.

Fils tang mezüngbuba Masters 1000 asayamung ka semi-final tonga asayaogo.

Inter Miami stadium tasenba nung Messi stand ka alitsü



Metsüremi/March 28, 2026 (Agencies): Inter Miami indang Nu Stadium nung Lionel Messi nem tetushi agüja stand ka pa tenüing nung jatsütsü.

'Leo Messi Stand' ya iba Major League Soccer club pur stadium tasenbuba nung mezüngbuba April 4 nü asayaba mapang sayatsü. Iba ya global sport nung kodanga matalokdangba ka asütsü kechiyong tang tasayadak aliba asayar ka tenüing nung stadium section ka jatsütsü lir.

Iba telemtetba agiba ajanga, Lionel Messi 2023 küm iba club nung oa adenba sülen pai kanga tongtibang shilem agiba sayur. Season ishika tsüngda

Argentina nungur forward asayar yagi Inter Miami ya takok marok akokba team ka kümdaktsüogo. Pa lenisüba nung club-i Leagues Cup, Supporters' Shield, Eastern Conference title aser MLS Cup kokogo.

Messi ya Inter Miami nung goal timtiba idaktsüba aser assist timtiba sütsüba asayar kümogo. Pai asaya 94 nung goal 82 idaktsür lir aser iba den assist-a 53 sütsür lir. Pai asaya nung maneni kanga junga asayaba aser pa dak asaya akoktsü tashi aliba ajanga pai takok aika ngutetogo, kong league MVP award atonga anguba aser MLS Golden Boot

anguba densema lir.

Club nung pa adenba ajanga iba club ya alima ajungai meteta kümogo aser iba ajanga Inter Miami aser Major League Soccer ya ajaki jangja kümogo.

Messi tenüing nung stand ka nungjaloktsütsü telemtetba agiba indang jembiba mapang Inter Miami-i, "yimya agi iba amala tetushi ya tesüiba mapang repranger agütsür," ta ashi

"Iba ya balaka lir. Iba yabo tang tatalokba dak ajemdaker agütsütsü, koba Leo asayaba tesemi ayaoka aiba mapangshia bilemba dak ajemdaker lir.

"Nisung ka tushibaji teti dangbo tapaka ka shibangba indang dang masü. Khen khenbo iba ya tangra dang nung alaka balaka ajungba yimdangi aruba indang lir," ta club sangdong ajangsa metetdaktsü.

Nu Stadium yagi club pur tang Fort Lauderdale nung amendaker asaya aliba melentsü. Iba state-of-the-art facility ya fan tem nem tajangshiba tajung agütsütsü nükjidong nung design süa yangluba lir.

MS Dhoni mezüngbuba hopta 2 masayatetsü

Metsüremi/March 28, 2026 (Agencies): Chennai Super Kings atema takoksa tulu ajurua parnok rongnungi nungtugu wicketkeeper-batter MS Dhoni temola yiruba ajanga taküm IPL nung hopta ana masayatetsüsa kümogo. CSK-i sangdong ka ajanga iba osang jangjatsüogo.

"MS Dhoni tang temola yiruba sülen anepaluba mapang ka lir. Pa TATA IPL 2026 nung mezüngbuba hopta ana masayatetsü," ta CSK-i ashi.

CSK pur taküm IPL nung mezüngbuba asaya Rajasthan Royals den Guwahati nung asayatsü.

Dhoni yiruba osang adokba sülen 2026 IPL ya pa asoshi tatembangbuba season asütsü ta jembiba tali küma odar. Temola yiruba den Dhoni ya temekok yiruba ajanga mapang

talangka kangshia arudar.

Chepauk nung tawa ROAR 26' fan event nung o jembiba mapang Dhoni-i pa temang tashi ajema küma aoba lemsatepogo.

CSK ya Ruturaj Gaikwad lenisüba nung mapang tatsüka asaya arudar aser wicketkeeper shilem agidaktsütsü asoshi parnoki Sanju Samson alizükogo aser uncapped wicketkeeper-batter Kartik Sharma atema sen crore 14.20 entokogo.

Dhoni-i IPL asaya 278 nung run 5,439 yanglua lir, Pa indang batting average ji 38.30 aser strike rate 137.45 lir. Pai half century 24 yanglur aser run timtibaji run 84 yanglur lir.

Pa iba asayamung otsü nung run timtiba yagluba asayarterm rongnung trokbuba nung lir.

Nungtugu badminton asayar Carolina asaya nungi anisüngzüker

Metsüremi/March 28, 2026 (Agencies): Tetsürtem rongnung nungtugu badminton asayar Carolina Marin-i la asaya nungi anisüngzüksü telemtetba agiba sangdongogo. La temekok yiruba ajanga mapang talangka timtema aruba ajanga iba telemtetba agitsüsa aküm.

Arishi küm 32 tain Spain tsür Olympic champion aser world title asem tashi bener alila yagi iba osang ya social medai nung video ka ajanga lemsatep. Lai, la taküm European Championships nung masayatsü ta shiogo, kong la tatembangbuba asayatsü imla liasü.

"Professional badminton asayar ka ama kü mapang tembangogo, anungji ni Huelva nung European Championships nung masayatsü," ta Marin-i ashi.

Taoba world No. 1 asayar yagi ashiba agi, la tatembangsa khen asayatsüba dang nungi la temang anepalutsü tongtibangba asüba agi iba telemtetba agi.

"Ni tatensa khen nenok ajak den ajurutepnüa liasü, saka ni iba atema kü temang lendong nung metoktsüner," ta lai ashi.

Marin-i la indang career nung takok aika nguogo, kong 2016 küm Rio Olympics nung gold medal anguba, 2014, 2015 aser 2018 küm world championship akokba densema lir.

La career indang jembiba mapang Marin-i la asaya nungi yamai anisüngzüksü imla maliasü ta ashi. "Ni kü indang career ya yamai mesüi tanga



Carolina Marin

yimya ka ajanga tembangtsü maangka angu asübo jungla ta bilemer, saka taküm nung khen khenbo asenoki bilemba ama mataloker aser aji agizüktsü nungdaker," ta lai ashi.

La anterior cruciate ligament yiruba anepaluba sülen tatemsa Paris 2024 Olympics nung asaya liasü.

Huelva nung masayaka Marin-i la European Championships nung adentsü ta shiogo. "Kasüka nungbo ni Huelva nung asaya nungi anisüngzüksü, saka kü teka nung racket amer masü saka yimti nem kü tashi ajak agüja asaya nungi anisüngzüksü, kong ni aso aser kodanga mamatoktsüsa tajangshiba aika nguogo," ta lai ashi.

Laisa, la dang temeim sayuba aser career tepeyong la nongita yariba atema ajak dang kanga pelaba lemsatepa liasü.

BILEMDANGANG

"Nisung ajak sempet, tangatetba, teshisadangba balala ta angatetsüla."